



# Synfocity = 566

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

17<sup>th</sup> December, 2015

## □ Synod Inkhawmpui 2015-a tiak ta

Mizoram Presbyterian Church Synod Inkhawmpui wavi 92-na, December 9 - 13, 2015 chhunga Tuikual Kohhran Biak Ina neih chu tluang takin a tiak ta.

December 9-12, 2015 chhung khan palai rorel inkhawm neih a ni a, rorel hi December 12 (Inrinni) chhunah zawh hman loh a nih avangin zan inkhawm banah rorel chhunzawm a ni a, tluang taka zawh a ni. Rorelnaah Nomination leh Pastoral thu bakah General agenda 81 lai ngaihtuah a ni.

December 13, 2015 (Pathianni) chawhma inkhawmah Pro. Pastor 18 Pastor atan a nemnghet a, Pro. Pastor atana lak thar mi 24 a dah ngheet bawk. Chawhnu Inkhawmah Synod Moderator, Rev. H. Lalrinmawia'n Lalpa Zanriah Sakramen a buatsaih a, kum 2015 chhunga Minister chatuan ram pan tate sunna hun hman a ni bawk. Zan inkhawmah Rev. Lalrinmawia, Moderator kalchhuakin thuchah hnuhnung (valedictory sermon) a sawi.

Kumin Synod-ah hian palai 1973 vel an awm a ni. Nakkum (2016) Synod Inkhawmpui chu December 6-11, 2015 chhungin Durtlang Bialin Durtlang Kohhran Biak Inah an thleng dawn a, Moderator chu Rev. Lalzuithanga a ni ang a, Thlarau lam thupui atan 'Kohhran Inpumkhatna' (Ephesi 4:1-3) thlan a ni a, Revd Chuauthuama, Ramhlun Vengchhak-in a sawi ang.

2016 Synod Inkhawmpuia Puipa turte chu :

<b>Moderator</b>	:	Rev. Lalzuithanga
<b>Secretary</b>	:	Upa H. Ronghaka (Sr.) Rev. Lianhmingthanga Sailo (Jr.)
<b>Finance Officers</b>	:	Rev. P.C. Pachhunga Rev. H. Remthanga
<b>Statistician</b>	:	Rev. R. Lalchangliana
<b>Executive Secretaries</b>	:	Rev. Lalramliana Pachuau Rev. B. Sangthanga

## □ Zin

December 17 - 21, 2015 chhunga Biateram Synod leh Biateram Kristian an nih kum 125 Anniversary lawmna neih turah Rev. Lalramliana Pachuau, Executive Secretary leh Upa. H. Ronghaka, Synod Secretary (Sr.) te an kal.

## □ Synod-in chhawmdawlina pe

Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	Champhai Vengthar	Kanghlum	2	Rs. 16,000/-
2.	Champhai Vengthar	In Kang Vek	1	Rs. 8,000/-
3.	Lamzawl	Damlo/Rethei	1	Rs. 8,000/-
<b>TOTAL</b>				<b>Rs. 32,000/-</b>

## □ MSSU

Naupang leh Tleirawl Inkhawm kaihhruaina bu la lam lo tan Synod Office, MSSU Dept.-ah a lam theih a. Kumthara VBS nei tur Kohhran te tan kaihhruaina bu a lam theih nghal bawk e.

## □ Campus Ministry

Wawiin (Dec. 17, 2015) chawhnu dar 1 khan Synod Campus Ministry chuan India Campus Crusade for Christ (North East Region) te nen tang hovin an resource neih zinga pakhat 'Isua Film' release-na hun JM Lloyd Hall, Synod Office-ah an nei.

Tlangzarh inkhawm hi Senior Executive Secretary-in a kaihhruai a, Rev. H. Lalrinmawia, Synod Moderator-in a tlangzarh a. Zaithiam zai ngaihthlak niin Mr. Damodar Sharma, Associate Director, India Campus Crusade for Christ-in thu a sawi a. India Campus Crusade for Christ te nen hian thawhhona kawng zawn mek a ni bawk.

## □ Synod Higher Sec. School

◆ December 8-11, 2015 chhunga Mizoram Higher Secondary School Games wavi 14-na, Aizawla neih zawh takah Synod Higher Secondary School chuan Gold -3, Silver -1 leh Bronze 3 laiin a pumpuiah pangana an ni a, Discipline pathum -Table Tennis, Taekwondo leh Athletics ah te an tel a, School 27 tel zinga panga an ni thei chu an lawm hle. Gold Medal hi Table Tennis Boys Team, Table Tennis Men Single's leh Teakwondo ah te an la a, Silver hi Table Tennis Men Single's a laiin Bronze Medal hi Table Tennis Girls Team, Table Tennis Girls Single's leh Taekwondo ah te an la bawk a ni.

◆ December 15, 2015 (Thawhlejni) khan Synod Higher Secondary School chuan nakum January 1, 2016 atanga Superannuation Pension a chhuak tur an Principal leh Secretary, Synod Education Board ni bawk, Pu Rozama Chawngthu thlahna hun hlimawm tak an hmang.

Principal thlahna hun hi chawhma lamah Krismas Urlawk programme atan hmangin zirlaiten Krismas lam hawi item hmuhawm tak tak an hmang a, chawhnu lamah Principal Thlahna Programme hman chhunzawm a ni a, he hunah hian Thawktu leh zirlaite aiawhin Citation mawi tak leh Pawisa fai Rs.50,000/- hlan a ni a, Synod Higher Secondary School Alumni Association leh School Prayer Cell atangin Ngaihhruihna Citation leh thilpek hlan a ni bawk.

Pu Rozama Chawngthu hi kum 1980 khan Synod High School zirtirtu atan lak a ni a, kum 1996 thleng High School zirtirtu ah a tanga, kum 1997 atanga Synod High School chu Higher Secondary School atana leh a lo nih khan Higher Section lamah kum 2007 thleng Lecturer hna a thawk leh a, kum 2008 khan Synod Executive Committee chuan Principal atan a ruat a, term hnih Principal a nih hnuin kumin 2015 hian Superannuation pension in a chhuak dawn ta a ni. Pu Rozama Chawngthu hi mi tumruh leh taima Thu leh Hla, Mizotawng leh Saptawng thiam tak, Zirtitu Tha chawimawina National Award To Teacher hial pawh lo dawng tawh a ni a, Synod Higher Secondary School tan chuan mi uiawm tak a ni ngei ang. Pu Rozama Chawngthu hi Pu Lalvena Hnamte Director, Mission Development Training Centre (MDTC) a thawk lai chuan nakum atang hian a thlak ang.

□ **SMTC**

December 15, 2015 (Thawhlejni) chawhnu dar 1:00 khan SMTC Lecture Hall, Mission Vengthlangah Vocational Training kharna hun an hmang.

Programme hi Rev. R.S. Rokima, SMTC Managing Committee Member-in a kaihruai a, Upa Vanlalhuma, Office Assistant-in reports a pe a, Rev. Lalramliana Pachuau, Executive Secretary & i/c Programme Director-in zirlaite hnenah Certificate a sem a, thuchah a sawi zui bawk.

Nl. Mercy Zohmingliani leh Tv. Zadingliana te zai ngaihthlak a ni a, Trainees aiawhin Tv. Zairemmawia (Puanthui zirlai) leh Tv. ALbert TBC Lalnunfela (Computer zirlai) te thusawi ngaihthlak a ni a, kal kim lawmman sem a ni bawk. SMTC hi kum 1993 Synod Inkhawmpui Rorel No. 48-na in a din a ni a, January 12, 1996-ah Pathian hnenah hlanin hawn a ni. A tira a hming chu Christian Multipurpose Centre (CMTC) tih a ni a, kum 2001 Synod chuan Synod Multipurpose Training Centre (SMTC) tiin a hming hi a thlak a ni.

Tun thleng hian he Centre-a zir chhuak tawh mi 1204 an awm a, tuna thlah tak te hi Puanthui zir (Hmeichhia) 35, Puanthui zir (Mipa) 13, Pheikhawk siam zir (mipa) 3 leh Computer zir 23 an ni a, an vaiin mi 74 an ni.

Vocational Training trade chi hrang hrangte hi thalaite hmasawna tur leh ram siamna pawimawh tak a ni a, hei hi Synod Policy lian tak a ni. Kum tin staff leh zirlaite tan Thlarau lam intuai tharna (spiritual retreat) buatsaih thin a ni. Puanthui zir chhuak, an mahni khuaa dawr tha tak nei leh Aizawla thawkzui engemaw zat an awm a, Missionary a kal 7 leh Kohhran Upa 3 lai an awm tawh bawk a ni.

□ **Social Front**

December 15, 2015 (Thawhlejni) khan Synod Social Front-in a vawikhatna atana pipe fit thiam (plumber) training a buatsaih chu Pi Zaii Hall, Synod Conference Centre-ah a kharna hun neih a ni.

Training kharna hi Upa H. Ronghaka, Synod Secretary (Sr.) in a kaihruai a, Upa H. Lalhmingmawia, Social Front Coordinator-in report pe a. Mizote hi kut themthiam hnam, la hriat ngai loh thil pawh a thiamin an tilai en a thiam ve thei nghal mai zel kan ni a. Pipe fit thiamte pawh kan ramin kan mamawh em em a, kan thalai hna neilo te tan eizawna siam sak zelna a lo nih bawk avangin Synod Social Front chuan hetiang hian training hi a buatsaih a. Mithiam an lo pun zel hian ram leh khawtlang tan mi tangkai an pung zel dawn a ni tih ringin training-a telte chu mi hman tlak leh chhawr nuam, a ruaitute tana rawih manhla ni ngei se an duh thu a sawi.

Synod Moderator Rev. H. Lalrinmawia'n fuihna thu sawiin zirlai chhuakte hnenah Certificate leh Pipe thread siamna (Pipe Threader) a hlan a. 'Eng hna pawh thawk ila, lungawi taka rinawmna leh tumruhna nen, taima takin ruihhlo laka fihlim chung a tih a pawimawh' tiin zirchhuakte a chah a. Nl. Sarah Lalngaihawmin Pathian fakna hla vawi hnih a sa bawk.

Synod Secretary (Sr.) Upa H. Ronghaka chuan 'Khawvel ram changkang apiangah kut hnathawk thiam bikte chu an ding chhuak ngei thin a, kan ram hmasawn chak takah pawh hian thiamna nei bikte dinhmun a tha zel dawn a ni,' a ti a. Hemi hun atana sawm bik Upa C. Lallunghnema, Superintending Engineer, PHE chuan trainee-te hriatna tizau thei thil pawimawh leh fuihna thuchah ngaihnam tak a sawi bawk.

Plumber training-ah hian trainee 13 an awm a, December 1 - 14, 2015 chung khan Zosaphluia Building kawtah training hi neih thin a ni a, hmun dangah practical neiin an chhuak thin bawk. Training chung hian hmanrua leh bungruate bakah chhun lama ei leh inte Synod Social Front hian a buaipui vek a ni.

□ **Synod chawlh leh kum thar Office hawn**

Naktuk (Dec. 18, 2015) khian Synod Office chuan Inthlahna hun an hmang dawn a, kum thara pension a chhuak tur leh hna dang avanga Synod Office chhuahsan turte thlahna thilpek hlan an ni ang. Synod Office hi December 19, 2015 (Inrinni) atangin Krismas leh Kumthar chhung khar a ni ang a, nakum January 5, 2016 (Thawhlejni)-ah Office hawn tan leh a ni ang.

Kum thar 2016-a Synod Programme pawimawh thenkhat te:

Bial thar hawn : January 9, 2016

Pastor Induction : January 10, 2016

Zir leh te Induction : May 8, 2016

□ **Hruaina Eng FM Radio & TV Programme**

◆ **DECEMBER 18, 2015 (FM ZOAWI AIZAWL @ 7:30 P.M.):**

**Zaipawl :** Kawrthah kohhran zaipawl - Chhandamtu apiang ta, **Solo :** PBK Liankhuma - Krismas ni eng, **Sermon :** Upa Bonny Lalrindika - Hmangaihna awmzia zirtirtu Krismas, **Zaipawl :** Bethlehem Pastor Bial zaipawl - Vanlal nau chu piang ve se, **Group :** Feli, Rachel & David - Tu hrai chawi nge

◆ **DECEMBER 25, 2015 (FM ZOAWI AIZAWL @ 7:30 P.M.):**

**Group :** Henry, Freddy, TBC, Tem-i & Feli - Naupiang i lawm ang u, **Zaipawl :** Dawrpui Bial Zaipawl - Ram ropui a angel te u, **Sermon :** Rev. H Lalrinmawia - Krismas thuchah, **Zaipawl :** Bawngkawn Pastor Bial Zaipawl - Riangvaite Lalpa pianni, **Solo :** B-tea - Krismas

◆ **DECEMBER 18, 2015 (FM LUNGLEI @ 7:30 P.M.)**

**Zaipawl :** Kawrthah kohhran zaipawl - Chhandamtu apiang ta, **Solo :** PBK Liankhuma - Krismas ni eng, **Sermon :** Upa Bonny Lalrindika - Hmangaihna awmzia zirtirtu Krismas, **Zaipawl :** Bethlehem Pastor Bial zaipawl - Vanlal nau chu piang ve se, **Group :** Feli, Rachel & David - Tu hrai chawi nge

◆ **DECEMBER 25, 2015 (FM ZOAWI AIZAWL @ 7:30 P.M.):**

**Group :** Henry, Freddy, TBC, Tem-i & Feli - Naupiang i lawm ang u, **Zaipawl :** Dawrpui Bial Zaipawl - Ram ropui a angel te u, **Sermon :** Rev. H Lalrinmawia - Krismas thuchah, **Zaipawl :** Bawngkawn Pastor Bial Zaipawl - Riangvaite Lalpa pianni, **Solo :** B-tea - Krismas

◆ **DECEMBER 20, 2015 (Tv Programme) @ 3:00 p.m) :**

**Weekly Round Up, School Programme :** Synod Higher Secondary School, **Sawihona :** Unity Carol Service chungchang

□ **Susamachar Prasaran Programme**

◆ **DECEMBER 20, 2015 (Pathianni) 5:00 pm.:**

**Group/Choir/Solo :** Hindi Bible School - Barmaja, **Group/Choir/Solo :** Vaivakawn Masihi Sangati - Aye he (Krismas), **Sermon :** Rev Darkhuma - Yishu Masih Ka Jaum Ke Vishae, **Group/Choir/Solo :** Venghnuai Kohhran - Daya Ka Sagar, **Group/Choir/Solo :** Hindi Bible School - Dhunia main chhaia

Synod Social Front Helpline: 9089777129;

Tuai & Patil Helpline : 8729800130;

Students' Helpline : 9856883377

www.MIZORAMSYNOD.ORG

Synod Information & Publicity  
Phone - 2314648

**Synfo**